

【四果】（科註第八二六頁第一行）

《三藏法數》「聲聞四果」：（出金剛經疏）

一、須陀洹果：梵語須陀洹，華言入流，又名預流，即初果也。謂此人斷三界見惑盡，預入聖道法流，故名入流。

二、斯陀含果：梵語斯陀含，華言一來，即第二果也。謂此人於欲界九品思惑中斷前六品盡，後三品（下三品）猶在，須更來欲界一番受生，故名一來。（思惑者，謂眼等五根對色等五塵，心起貪愛，迷惑不了也。）

三、阿那含果：梵語阿那含，華言不來，即第三果也。謂此人斷欲界後三品思惑盡，更不來欲界受生，故名不來。

四、阿羅漢果：梵語阿羅漢，華言無學，即第四果也。謂此人斷色界、無色界思惑盡，四智已圓，已出三界，已證涅槃，無法可學，故名無學。（四智者，我生已盡，梵行已立，所作已辦，不受後有也（即悟四諦之智）。梵語涅槃，華言滅度（滅煩惱，度生死）。）

【有餘涅槃】（科註第八二六頁第二行）

《佛學大辭典》：（術語）有餘涅槃者，對無餘涅槃而言。有餘無餘其解有三種：

一、唯就小乘說。斷一切之煩惱而絕未來生死之因者，尚餘今生之果報身體，謂之有餘涅槃，其人今生之果報盡而歸於寂滅，謂之無餘涅槃。即證得阿羅漢其身存生之間，為有餘涅槃，其身死時，乃無餘涅槃也。故有餘涅槃者無生死之因，唯

有生死之果（此前生所招之果報），無餘涅槃者，無生死之因，亦無果也。又云有餘依涅槃，無餘依涅槃，依者依身，身為人

之所依，故名依身。

法華經信解品曰：「我等長夜，修習空法，得脫三界苦惱之患，住最後身有餘涅槃。」（最後身：謂生死界中最後之身。阿羅漢及等覺菩薩之身也。）

寶窟下本曰：「因亡名有餘，果盡名無餘。」唯識述記十末曰：「其因盡苦依未盡，異熟猶在，名有餘依。依者身也，〔中略〕此中有餘，約二乘說，以言唯有微苦依故，依謂依身。」

（異熟：舊譯果報，依過去之善惡而得之果報總名）

二、唯就大乘說。變易生死之因盡，謂之有餘涅槃，變易生死之果盡，而得佛之常身，謂之無餘涅槃（凡夫之生死謂之分段，菩薩之生死謂之變易）。

寶窟下本曰：「金剛心斷變易因盡，而變易果猶存，有餘累故曰有餘。佛果為解脫道起，則無復因累，變易生死果亦亡，則無復果累，故名無餘也。」（金剛心：四教儀曰：「更斷一品無明入等覺位，亦名金剛心，亦名一生補處。」）

三、就大小相對說。小乘之無餘涅槃，尚有惑業苦三道之殘餘，故云有餘，大乘之無餘涅槃，究竟而無殘餘，故云無餘。

勝鬘經曰：「有有為生死，有無為生死。涅槃亦如是，有

餘及無餘。」（無為生死：變易生死，勝鬘經謂之無為生死。以聖者為無為之人，無為人所受之生死也。）又曰：「以成就有餘解脫有餘清淨有餘功德故，知有餘苦，斷有餘集，證有餘滅，修有餘道，是名得少分涅槃。」

法華經譬喻品曰：「我本著邪見，為諸梵志師。世尊知我心，拔邪說涅槃。我悉除邪見，於空法得證。爾時心自謂，得至於滅度。而今乃自覺，非是實滅度。若得作佛時，具三十二相。天人夜叉眾，龍神等恭敬。是時乃可謂，永盡滅無餘。」

寶窟下本曰：「小乘中因果盡名有餘，大乘因果盡名無餘。」

佛性論云：二乘有三種餘：一煩惱餘，謂無明住地。二業餘，謂無漏業。三果報餘，謂意生身陰。」（無明住地：於根本枝末中為根本無明，於我法二執中為法執。是一切煩惱之所依，為變易生死之因，故名住地。意生身：初地以上之菩薩身。為眾生濟度如意受生而得之身，故名。）